

# Dithero tsa Tirelano mo Kutlwanong

47/2015 Thero ka Sontaga wa 15 morago ga moletlo wa Trinitate, e le ka 13. 09. 2015

## **Mo leineng la Modimo o e leng Rara le Morwa le Mowa o o Boitshepo!**

Lefoko le le okamelang beke eno, le kwadilwe mo go 1 Pet. 5:7, le re: **"Latlhelang mashwenyego otlhe a lona mo go one, gone lo tlamelwa ke one."**

1. Sefela sa 202 - 187/195

**2. Thapelo:** Morena Modimo wa kutlwelobotlhoko, re boka lorato lwa gago lo lo sa khutleng, lo re lo bonang sešwa ka letsatsi lengwe le lengwe. Rona baleofi ba timelo, ba tatlhego, re solofela kutlwelobotlhoko ya gago fela, fa e tla re itshwarela dibe tsotlhe tsa rona, le go re abela maatla a a batlegang mo ntweng ya rona ya go lwa le Satane, le lefatshe, le nama ya rona, le go re isa tsholofelong ya rona ya botshelo jo bo sa khutleng mo legodimong, e le ka ntlha ya lorato lwa gago, lo lo mo go Keresete Jesu, Morena wa rona. Amen.

3. Lefofoko la Testamente e kgologolo le kwadilwe Gen. 2:4-15;

Epistolo ka fa thulaganyong ya 2 e kwadilwe mo go 1 Petoro 5:5c-11;

Efangele ka fa thulaganyong ya 3 e kwadilwe mo go Luka 18:28-30.

4. A go ipolelwe tumelo ya bokeresete!

5. Sefela sa 204 - 189/187

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Matheo 6:24-34, e re: "[Ga go ope yo o ka direlang barena ba le babedi; gone o tla tlhoa yo mongwe, mme a rate yo mongwe; gongwe o tla ngaparela yo mongwe, mme a nyatse yo mongwe. Ga lo ka ke lwa direla Modimo le Mamone.] Ke ka ntlha ya moo ke lo rayang ke re: Se tshwenyegeleng botshelo jwa lona gore lo tla ja eng, lo tla nwa eng, le fa e le mmele gore lo tla apara eng? Botshelo a ga bo gaise dijo, le mmele a

ga o gaise diaparo? Lebang dinonyane tsa leapi; ga di jwale, e bile ga di robe, le fa e le go phuthela mo difaleng; mme Rraalona wa legodimo o a di otlala. Lona a ga lo di gaise segolo? Ke ofe wa lona yo o ka ikoketsang boleele jwa letsogo le le lengwe fela ka go itlhofaelela? Lo tlhofaelelang diaparo? Elang dithunya tsa naga tlhoko ka fa di golang ka teng; ga di dire, ga di otlhe; mme ke lo raya ke re: Le fa e le Salomo mo kgalalelong yotlhe ya gagwe o ne a sa kgaba jaaka sengwe sa tseo. Fa Modimo o apesa jalo bojang jwa naga, jo bo leng teng kajeno, mme ka moso bo latlhelwa mo leising, a ga o kitla o lo apesa bogolo lona ba tumelo e potlana? Ka moo, se tshwenyegeng lwa re: 'Re tla ja eng, gongwe, re tla nwa eng, gongwe, re tla apara eng?' Gonne tsotlhe tseo di batlwa ke baheitane; kana Rraeno wa legodimo o itse gore tsotlhe tseo lo tshela ka tsona. Jalo he, batlang pele puso ya Modimo le tshiamo ya ona, mme tsotlhe tseo lo tla di okelediwa. Ka moo he, se tshwenyegeleng letsatsi la ka moso; gonne letsatsi la ka moso le tla itshwenyegela ka losi. Letsatsi le lekanywe ke tshwenyego ya lona." Amen.

**8. Thero:** Barategi mo Moreneng wa rona Jesu Keresete, mafoko a Efangele ya kajeno a ntshitswe mo therong ya Morena Jesu e a e reretseng barutwa ba gagwe mo thabeng. Mo go yona Morena Jesu o ne a ruta batho ka ga puso ya gagwe. Johane mokolobetsi o ne a mmaakanyetsa tsela ka go rerela batho lefoko le le amileng dipelo le le reng: "Tlhabologang, gonne puso ya Modimo e atametse." Morena Jesu le ene a simolola tiro ya gagwe ka ona mafoko ao. Puso ya molao wa kgolagano e kgologolo e tswa mo moriting, e tsena mo leseding gore batho ba angwe tota ke molao. Morena Jesu o re golola mo khutsong ya molao, le mo bokgobeng, o re dira bana ba Modimo. Rona bakeresete re bana ba Modimo ka go kolobediwa mo leineng la Modimo Rara le Morwa le Mowa o o Boitshepo. Re a ipolela gore Jesu Keresete ke Morena wa rona. Ka re le mo pusong ya Morena Jesu, matshwenyego a botshelo jwa rona ga di na go re fenya, mme ke rona ba re tshwanetseng go a fenya. Efangele ya kajeno e re ruta ka dithuto tse tharo ka fa re ka di fenyang ka teng. Ke tse:

1. Re a ipolela gore Jesu ke Morena wa rona.
2. Re solofela thata e kgolo ya gagwe e e fetang matshwenyego a rona.
3. Re batla puso ya Modimo le tshiamo ya ona.

1. Rona bakeresete re bana ba Modimo. Gape re batho ba ba tshelang mo lefatsheng. Go nna ga rona mo lefatsheng ke go nna mo matshwenyegong le mo ditlhobaelong. Jaanong ditlhobaelo tseo ke tsa eng? Morena Jesu o re fa Lefoko le le re thusang go tshaloganya kamogelano ya rona le tsa lefatshe, a re: Ga go ope yo o ka direlang barena ba le babedi. Le fa a ka dira ka botlhale, a loge maano a mantsi, go tla nna ka fa Morena Jesu a buang ka teng, a re: O tla rata yo mongwe, le go tlowa yo mongwe mo pelong ya gago gongwe o tla ngaparela mongwe, o nyatse yo mongwe mo tirong ya gago. Ke ka moo a re kaelang, a re: Lona bana ba Modimo, lo ka se ka lwa direla Modimo le mamone. Fa a re mamone, o raya tsotlhe tse di mo lefatsheng, tsotlhe tse re di eletsang, le tse re nang natso, tse re di ruileng, gape o raya tlotlego mo gare ga batho. Go na le barena ba le babedi ba ba batlang gore re ba direle ka pelo ya rona, e bong Modimo, Morena wa rona, le ona mamone o re nang nao mo lefatsheng. Se se makatsang ke se: Ba teng ba ba reng: ba ka direla ka bobedi jwa bone mmogo. Mme Morena Jesu o re bolelela ka thanolo kajeno gore ga re ka ke ra ba direla mmogo, gonne go a palega. Dipuso tse pedi tseo di kgaogane, e bile di fapaanye. Yo o direlang lefatshe le tse di mo lefatsheng le dikgatlhego tsa lona, ene o emalalana, o tlabana le Modimo. Gape yo o ratang Modimo ruri, a ka se ka a ineela mo lefatsheng ka pelo ya gagwe. O rata mongwe, o tlowa yo mongwe. Yo o solofelang thuso mo Modimong, o tla o direla.

Yo o reng o ka direla ka bobedi jwa barena ba mmogo, o a itsietsa. Fa o ipolela gore o ngwana wa Modimo, ga o ka ke wa letlelela pelo ya gago go itumelela dibe. Ke gore go a bonala gore motho o ka direla Morena a le mongwe fela. Ga go kgonege gore kajeno re direla morena mongwe, mme kamamoso re direla Morena yo mongwe. Ga se gore re sa ntse re ikgethela Morena wa rona, gonne rona bakeresete re amogetswe ka kolobetso mo pusong ya Morena Jesu. A re mo direleng, ene fela, re se mo tlogele le fa dikotsi le matshwenyego a ka nna teng mo botshelong jwa rona mo lefatsheng. Kana re na le go begela Kgosi ya rona. Morena wa rona ke yo o sa fenngweng ke sepe.

2. Ka moo re utlwa thuto ya bobedi ya kajeno e e reng: Bakeresete ba solofela Kgosi Jesu Keresete, le thata e kgolo ya gagwe e e fetang matshwenyego otlhe a

rona. Morena Jesu a re: "Se tshwenyegeleng botshelo jwa lona gore lo tla ja eng, lo tla nwa eng, le fa e le mmele gore lo tla apara eng? Botshelo a ga bo gaise dijo, le mmele a ga o gaise diaparo?" A re tlhokomeleng sentle! A matshwenyego ke boleo ka boona? A go na le motho yo o se nang matshwenyego? Pula e sena go na, a ga o tlhokomele gore o kgone go lema? Fa ngwana wa gago a bolawa ke tlala, a go o tlhokomele go mmatlela dijo? Fa a bolawa ke serame, a ga o mmatlele kobo? Go na le pharologanyo fa gare ga matshwenyego le matshwenyego. Ka ntlha ya go wela mo boleong Modimo o beile matshwenyego le ditlalelo mo bathong, wa bolelela Atame, a re: "Masimo a hutsitswe ka ntlha ya gago. O tla ja tsa ona ka matsapa ka malatsi otlhe a botshelo jwa gago." Ke gore re tshwanetse go lemoga pharologanyo e e leng teng fa gare ga matshwenyego a go itshwenyegela fela, le matshwenyego a a leng teng ka ntlha ya matsapa a a beilweng mo go rona ka ntlha ya boleo. Re se oketse boleo ka go itshwenyegela, le go itlhobaelela, le go direla mamone! Re gopole gore go na le matsapa ka boona ga se boleo, mme ke tse di latelang boleo. Atame o ne a leofa, ga tsena matsapa. Go nna mo lefatsheng ke go nna mo matsapeng, gonne re leofile rotlhe. Ka moo re lema, re bereka, re na le poifo ka go botsa gore a thobo e tla nna teng? A re tla bona pereko? A re tla bona dijo? A re tla bona diaparo? Ke fa re le mo kotsing le mo thaelong ya go direla mamone ka go itlhobaelela, le go itshwenyegela. Ke fa re bua, re re: A re berekeng, re dire tse dintsi le ka botlhale jo bogolo gore re rue tse dintsi, re iperekele, re bone tse dintsi, le fa di batliwa ka go tlola ditaolo tsa Modimo, matsapa a rona a fokotsege. Ke fa re fetoga go nna badiredi ba ga mamone.

Morena Jesu a reng? Rraeno yo o mo legodimong o jesa le dinonyane. Modimo o kgabisa majang a naga ka bontle. Ga o kgone go oketsa boleele jwa gago, le fa e le ka letsogo le le lengwe fela, le e seng go leelefatsa botshelo jwa gago ka ura e le nngwe fela ka go itlhobaelela. Nyaya, o gopole gore o ngwana wa Modimo. O gopole gore o pholositswe ka go itshwarelwa maleo ka ntlha ya ga Jesu. Latlhela, matshwenyego otlhe a gago mo Modimong, Rraetsho yo o mo legodimong, o a go tlamela. Ke ene yo o fenyang matshwenyego otlhe a gago.

3. Ka moo re kaelwa ka kgatelelo e kgolo kajeno gore rona bakeresete re batle pele puso ya Modimo le tshiamo ya ona. Morena Jesu yo o re kaelang ka kaelo e, o a

itse gore dipelo tsa rona di batla go ngaparela tsa lefatshe, le go di batla pele, re ise re batle tsa puso ya Modimo. O a itse gore re solofela dithoto le dithuo tse di nyelelang tsa lefatsha leno go feta Modimo o e leng Morena wa tsotlhe. Kana mongwe le mongwe yo o ratang tsa lefatshe leno go feta Modimo, o dira tsa lefatshe modimako wa gagwe. Re ithutile mo taolong ya ntlha gore Morena, Modimo wa rona, o batla go nna Modimo wa rona, ga o nke o naya medimo e sele kgalalelo ya ona. Rona bakesetse re a itse gore ke ene Rara wa rona yo o mo legodimong o o dirang gore letsatsi le tlhabe mo mosong gore le phatsimisitse ba ba siameng le ba ba bosula, o nesa pula mo go ba ba molemo le mo go ba ba bosula. Ka moo re kopa mo go ene gore a tshegofatse ditiro tsa rona, re je, re nwe, re apare, ka re le bana ba gagwe. Matshwenyego le matsapa a re tshwenya ka ntlha ya maleo a rona, mme re tshwanetse go a fenya, ka go dumela, le go solofela, le go ikanya tsholofetso ya ga Rraetsho e e reng: O tla re tlamela, o itse, fa re di tlhoka tse tsotlhe tseo. O re solofeditse a re: "Jalo he, batlang pele puso ya Modimo le tshiamo ya ona, mme tsotlhe tseo lo tla di okelediwa. Ka moo he, se tshwenyegeleng letsatsi la ka moso; gonne letsatsi la ka moso le tla itshwenyegela ka losi. Letsatsi le lekanywe ke tshwenyego ya lona."

A re gopoleng gore re ka fenya matsapa le matshwenyego a lefatshe fela, fa re ikanya gore Jesu ke Morena wa rona, ke ene yo o nonofileng, ke ene yo o di fentseng tsotlhe, re batle puso ya gagwe, re bolokelwe mo go ene. Re ikanye gore ke ene Mofenyi, e seng wa matsapa a tsa mmele fela, mme bogolo ke Mofenyi wa boleo jo bo re tliseditseng matsapa. Amen.

**9. Thapelo:** Morena, Modimo, Mong-wa-thata-tsotlhe, re lebogela bopelotlhomogi jwa gago, gonne o re abela tsotlhe tse re di tlhokang mo tsamaong ya rona ya malatsi otlhe. Re kopa mo go wena gore o se tlose tshegofatso ya gago. O re femele mo tsietsong e kgolo ya tirelo ya ga mamone. O re thuse rona ba re leng bana ba gago ka Jesu Keresete gore mamone a se ka a bona thata mo dipelong tsa rona, mme re nne bafenyi ba matsapa le matshwenyego a malatsi otlhe a a lekang go re kgaoganya le wena, mme re a fenye tse di lekang go re timetsa. O re thuse gore re go direle, re go ikanye, wena wesi, wena yo o leng Morena a le esi wa rona. O re fe Mowa wa gago gore re batle puso ya gago le tshiamo ya gago, go ya

re tsena mo pusong ya kgalalelo ya gago kwa re tla go direlang teng re golotswe gotlhe-gotlhe, re sa tlhole re leofa. Ke ka ntlha ya bopelotlhomogi le boitshwarelo jo bo mo go Keresete Jesu, Morwao yo o rategang, Morena wa rona. Amen.

Thapelo ya Morena: Rara wa rona yo o mo legodimong ...

#### 10. Sefela sa 201 - 186/194

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke C. Johannes (†), ka ngwaga wa 1967/2003.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.